


明朝典彙



漢書門			
九	一	〇	〇
〇	四	三	六
類	號	函	架

內閣文庫			
九	〇	〇	漢
〇	四	三	書
類	號	冊	架

內閣文庫			
番號	漢	9205	
冊數	64 (43)		
函號	294	39	

四十三



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM. Kodak



國朝典彙卷一百十七

禮部

都察院右僉都御史 臣 徐學聚 編輯

浙江金華府推官 臣 朱又煥 訂正

後學徐時鼎 重訂

淺草文庫

山川社稷諸神壇廟

洪武元年二月中書省臣李善長等進社稷議曰周室少

宗伯掌建國之神位右社稷左宗廟社稷之祀壇而不
屋必受霜露風雨以達天地之氣凡起大事動大眾必
先告於社而後出其禮可謂重矣蓋古天子社以祭五



土之祗稷以祭五穀之神其制在中門之外朝門之內尊而親之與先祖等人非土不立非穀不食以其同功均利以養人故祭社必及稷所以爲天下祈福報功之道也然天子有三社爲羣姓而立者曰大社其自爲立者曰王社又有所謂勝國之社屋之不受天陽國雖亾而存之以重神也後世天子之禮惟立大社大稷以祀之社皆配以勾龍稷皆配以周棄漢因高祖除亾秦社稷立官大社大稷一歲各再祠光武立大社稷於洛陽在宗廟之右春秋二仲月及臘一歲三祀唐因隋制並建社稷於含光門之右仲春仲秋二時戊日祭之玄宗

升社稷爲大祀仍以四時致祭宋制每歲以春秋二仲月及臘日祭之元世祖營社稷於和義門內少南以春秋二仲月上戊日致祭今宜祀以春秋二仲月上戊日學士陶安言社稷制屋非禮若祭日遇風雨則於齋宮望祭上從之

命道士周原德往登萊州祀海神

十一月定天子親祀圜丘方丘宗廟社稷若京師三皇孔子風雲雷雨聖帝明王忠臣烈士先賢等祀則遣官祭祀郡縣立社稷有司春秋致祭庶人祭里社土穀之神及祖父母父母并得祀竈載諸祀典餘不當祀禁止

十二月頒社稷壇於天下郡邑壇設城西左社右稷各方
二丈五寸高三尺四寸陛三級祭用春秋二仲上戊日
上親祀社稷會大風雨還坐外朝怒儀曹議禮不令以致
天變將殺之章溢奏曰風雨已連朝無足怪者縱禮官
議有未盡 陛下一誠自足以格神明願寬雷霆之怒
上爲之霽威

太常寺奏擬立秋後辰日祀靈星立冬後亥日祀司中司
命司人司祿如唐制立壇於城南 上從之

詔立旗纛廟京師於都督府治之後天下衛所於公署後
以霜降日致祭

二年正月勅封和州城隍爲承天監國司民靈護王仍頒
降神像冕服九旒九章青衣緋蔽膝緋白帶緋襪初
上兵駐和州及渡江神皆著異至是特賜封號

命天下凡祀典神祇有司依時致祭其不在祀典而嘗有
功德於民者雖未致祭其祠宇禁人撤毀

命中書省定太歲風雲雷雨嶽鎮海瀆山川城隍諸神壇
壝祭禮

命都督孫遇仙等一十八人祭天下嶽鎮海瀆之神 上
服皮弁服御奉天殿禮官以香及祝文進 上署御名
以香祝文授使者百官公服送至中書省使者遂行仍

與白金市祭物牲用太牢幣各從其方色各祝文語存
諸禮官副在有司

封京都及天下城隍之神 上謂禮官曰明有禮樂幽有
鬼神茲以臨御之初與天下更始凡城隍之神皆新其
命於是命翰林詞臣撰制文以頒之在應天者封以帝
在開封臨濠太平府和滌二州者以王在府州縣者以
公以侯以伯應天袞冕十二章開封等五府州及各府
九旒九章州縣七旒七章

初命築壇於後湖祀馬祖先牧馬步馬社諸神至是禮官
奏言周官春祭馬祖夏祭牧人冬祭馬步馬祖天駟星

也先牧始養馬者馬社始乘馬者世本曰馬步謂神之
災害於馬者今擬春秋二仲月甲戌庚日遣官行禮

八月禮部尚書崔亮請依周官門戶中霤竈井五祀歲終
臘享通祭於廟門外羣臣四品以上祀中霤門竈三神
五品以下祀門竈二神命著爲令

三年正月遣使往安南高麗占城祀其國山川仍命各國
圖其山川及摹錄其碑碣圖籍付使者還所至諸國皆
勒石紀其事

初以太歲風雲雷雨皆天神以嶽鎮海瀆山川城隍皆地
祇各爲壇專祀於國城之南然祭之時日與其品物各

不同至是復以風雲雷雨嶽鎮海瀆皆陰陽一氣流行無間者遂合二壇而一之增以四季月將旗纛諸神凡設壇十有九太歲四季月將爲第一次風雲雷雨次三嶽次五鎮次四海次四瀆次京山鍾山次江東次江西次湖廣次淮東淮西次浙東西福建次兩廣海南海北次山東山西河南河北次北平陝西次左江右江各山川次安南高麗占城諸國山川次京都城隍次六纛大將五方旗神戰船金鼓鏡礮弓弩飛鎗飛石陣前陣後諸神各壇之祭皆上躬自行禮先祭禮官奏祝文太歲以下至四海凡五壇上稱臣者請親署名其鍾山

等神上稱余者請令禮官代署上曰朋友署贖往來尚親題姓名况神明乎必皆親署及登壇太常司丞任以忠贊禮慮上力倦頗簡薦跪之儀禮畢上問故以忠以實對上曰人臣愛君以道朕於神惟恐誠敬未盡何敢憚勞汝當悉朕意後勿復然

六月定嶽鎮海瀆城隍諸神號詔曰朕惟爲治之道必本於禮考諸祀典如嶽鎮海瀆之封起自唐世崇名美號歷代有加在朕思之則有不然夫嶽鎮海瀆皆高山廣水自天地開闢以來至今英靈之氣萃而爲神必皆受命於上帝幽微莫測豈國家封號之所可加瀆禮不經

莫此爲甚至於忠臣烈士雖可加以封號亦惟當時爲宜夫禮所以明神人正名分不可僭差今依古定制凡嶽鎮海瀆並去前代所封名號止以山水本名稱其神五嶽稱東嶽泰山南嶽衡山中嶽嵩山西嶽華山北嶽恒山之神五鎮稱東鎮沂山南鎮會稽山中鎮霍山西鎮吳山北鎮醫無閭山之神四海稱東海南海西海北海之神四瀆稱東瀆大淮南瀆大江西瀆大潁北瀆大濟之神各城隍稱某府州縣城隍之神歷代忠臣烈士並依當時封爵稱之惟孔子明先王要道爲天下師以濟後世非有功於一方一時者可比所有封爵宜仍其舊天下神祠無功於民不應祀典者卽淫祠也有司無得致祭

躬署祝文遣官詣嶽鎮海瀆以更定神號告祭

遣秘書監直長夏祥鳳等頒革正神號詔於安南等國

中書省臣奏凡民庶祭先祖歲除祀竈鄉村春秋祈土穀之神凡有災患禱於祖先里社若鄉厲邑厲之祭則郡縣自主之其僧道建齋設醮不許奏章上表投拜青詞亦不許塑畫天地神祇及白蓮社明尊教白雲宗巫覡扶鸞禱聖書符呪水諸術並加禁止詔從之

九月京師城隍廟成禮部尚書陶凱請如前代六曹曰吏

戶禮兵刑工二司曰左右司之神 上命罷六曹不必
設左右司止稱曰左司神右司神仍命製神主主用丹
漆字塗以金旁飾以龍文及是成命凱等迎主入廟用
王者儀仗 廟舊東嶽行宮也

按國初都城隍之神歲以五月十一日爲誕辰神及萬
壽聖節各遣官致祭禮部尚書倪岳言城隍之神本非
人鬼安得誕辰每歲南郊大祀壇八月山川壇俱有合
祭之禮事體已重此與天下府州縣之祭不同遂罷之
十二月 上以兵革之餘死無後者其靈無所依命議祀
禮禮官奏按祭法王祭泰厲諸侯祭公厲大夫祭族厲

泰厲古帝王之無後者公厲古諸侯之無後者族厲古
大夫之無後者春秋傳曰鬼有所歸乃不爲厲此等無
依之鬼乃或依附土木爲民禍福以邀享祀者今宜於
國都王國各府州縣及里社皆祭祀之使鬼有祭享禍
厲不興亦除民害之一也 上命京都築壇於玄武湖
中天下府州縣設壇城北各里亦立祭壇歲以清明七
月望十月朔長吏率僚佐晡時致祭正壇設城隍位壇
下東西各席地壇之南立石刻祭文京都曰泰厲王國
曰國厲府州曰郡厲縣曰邑厲民間曰鄉厲著爲定式
四年正月建園丘方丘日月社稷山川壇於臨濠

五月詔立大社壇於中都

六年定天下十三省山川皆各省自祭舊合祭京師及四夷山川悉罷之各城隍祭日春正月三日秋九月九日七年令仲春秋上旬擇日祭太歲四季月將諸神未幾以諸神從祀南郊遂省春祭

定府州縣社稷祭正配皆少牢已而罷配嶽鎮海瀆亦如之歲仲春秋擇上旬日祭按府州縣凡近郊每三壇南神祇壇歲仲春秋祀雲雨風雷之神境內山川之神城隍之神各少牢在省城者布政司祭府不別祭縣附府者亦如之西社稷壇歲仲春秋上戊祀司社司稷之

神各少牢北厲壇歲上元清明孟冬朔日祭無祀鬼神羊三豕三飯米三石

八年二月禮部尚書牛諒言京都既罷祭天下山川其四夷山川亦非天子所當躬祀乃命別議中書及禮部議奏以外夷山川附祭於各省如安南占城真臘暹羅瑣里則附廣西三佛齊瓜哇則附廣東日本琉球淳泥則附福建高麗則附遼東甘肅朶甘烏思藏則附陝西又言各省山川與風雲雷雨既居中南向其外夷山川神位宜分東西同壇共祀上可其奏命頒行之

七月禮部奏五祀之禮擬以孟春祀司戶之神設壇於皇


國朝典彙卷一百一十八 壇廟
宮門左司門主之孟夏祭祠竈之神設壇於御厨光祿寺官主之季夏祀中霤之神設壇於乾清宮丹墀內官主之孟秋祀司門之神設壇於午門之左司門主之孟冬祀司井之神設壇於井前光祿寺官主之四孟月之祭則於有事太廟之日牲用少牢 制可

十年二月遣官享先農命應天府官率農民耆老陪祀上親祀山川壇諸神於殿中功臣分祀兩廡

六月命公李善長徐達等十人分祀嶽鎮海瀆

八月 上既更建太廟於雉闕之左以社稷國初所建未盡合禮又以大社大稷分祭配祀皆因前代之制欲更

嚴之爲一代之典遂命中書下禮部詳議尚書張鑑奏擬社稷合祭共爲一壇皆設木主而丹漆之祭則設於壇上祭畢收藏仍用石主埋壇之中如唐宋之制請罷勾龍與棄配位而奉 仁祖淳皇帝配享大社大稷以成一代之盛典以明祖社尊而親之之道 上覽奏稱善遂命改建社稷壇於午門之右其制社稷共一壇壇二成上廣五丈下如上加三尺崇五尺陛四出築以五色土色如其方而覆以黃土四面皆甃以甃石主崇五尺埋壇之中微露其末外壇牆崇五尺設靈星門於四面壇牆各飾以色如其方外爲周垣飾以丹覆以黃瓦



初社稷列中祀臨祭或具通天冠絳紗袍或以皮弁行
禮制未有定今倣唐制升爲上祀具冕服以祭

按五方土命應天河南進黃土浙福兩廣進赤土江西
湖廣陝西進白土山東進青土北平進黑土天下郡縣
計三百餘處每土百斤爲率仍取之各山高爽之地

十月新建社稷壇成 上行奉安禮冕服乘輅百官具祭
服詣舊壇以遷主告

十一年二月祭大社大稷前二日詣奉先殿告 仁祖淳
皇帝配祭日陳設大社在東大稷在西俱北向 淳皇
帝東向

十月議定在京大祀中祀俱用幣在外王國及府州縣祀
典神祇亦如之其餘小祀止用牲醴

十二年四月遣祭安東洙陽野鬼御製勅文諭祭之曰未
嘉侯朱亮祖奏安東洙陽二縣之野夜有持炬者數百
或成列或四散民人相驚逐之不見擊之若有應者朕
不能盡信特致牲醴會鬼神而勅問之中原自有元失
政生民塗炭死者不可勝計有覆宗絕祀者有生離父
母妻子而死於非命者爾持炬者豈無主孤魂而欲人
之祀與父母妻子之永隔而有遺恨與無罪遭殺而寃
未伸與或有司怠於歲祀而有忿與四者必有一焉朕

以四事問爾爾果何爲而然與朕自卽位以來祀神未嘗有缺禮然非當祀者亦不敢佞爾持炬者宜禍其宜禍者而福其應福者勿妄爲民害自貽天憲

八月御史劾溧水縣祭祀稷以牛醢代鹿醢禮部言著令凡祭物缺者許以他物代上曰夫祭物所謂缺者以非土地所產溧水固有鹿何得謂缺是有司無誠心於祀神而故爲苟簡也夫百司所以能盡其職而理民事者以其常存敬懼之心耳今溧水之官於神猶怠忽之則於人事又何懼焉命論如律

國初各布政司府州縣社稷山川等壇原定行禮獻官以

守禦武臣爲初獻文臣爲亞獻終獻十四年上命今

後祭祀以文職掌官通行三獻禮武官不與祭禮部言古之刑官尚不與祭而况兵又刑之大者乎不令武官與祭所以嚴事神之道而達幽明之交者也著在禮制頒行天下有年矣請朝廷遇有遣官攝祭亦準此制而以禮官行事庶合周官大宗伯王不與則攝之文

十四年令在外祭山川等神以文職長官一員行禮武官不預如軍民指揮司則從本司行之

二十一年增修壇壝於大祀殿丹墀中壘土爲臺東西相向爲壇四以祀日月星辰壝外以次爲壇二十亦東西

向以祀嶽鎮海瀆風雲雷雨山川太歲天下神祇歷代帝王命文武大臣及近侍官二十四人分獻遂罷朝日夕月熒星之祭及太歲風雲雷雨嶽鎮海瀆山川月將城隍歷代帝王亦罷春祭惟歲八月中旬擇日於山川壇及帝王廟祭之

二十三年二月考定王國合祀山川諸神 上曰王國有嶽鎮海瀆卽以岳爲主次海次鎮次瀆風雲雷雨之神又次之於是禮部爲圖以進使頒之列國復命東海則燕齊皆祭東嶽東鎮齊魯皆祭秦蜀祭西海晉祭北海永樂初禮部奏建文中改天地壇山川壇并籍田泗州

州祠祭署名又增置鍾山祠祭署 上命天地壇定爲郊壇祠祭署山川籍田泗州宿州仍復舊鍾山祠祭署不可罷

元年五月設北京社稷壇祠祭署隸北京行部建山川壇位建一如南京進祀天壽山於鍾山下

二年二月遣應天府官祭先農命郡縣耆老陪祀著爲令五年九月建龍江天妃廟成命太常少卿朱輝祭告時太監鄒和使古里勅加諸番國還言神多感應故有是命七年三月朔 車駕巡狩北京駐蹕東平州望祭泰山畢顧侍臣曰昔舜巡狩至泰山舉祀禮覲諸侯一正朔考

制度而已蓋欲使天下同風後來秦皇漢武皆有侈心
登封泰山薦道功德以誇示後世終不免後世之非議
太祖一天下立法制五六十年國不異政家不殊俗朕
謹遵成憲此行亦惟欲親巡撫使軍民各得其所耳
八年正月以親征遣行在太常寺卿朱煌祭宣府山川城
隍修社稷山川先農壇

十四年夏祠祭郎中周訥請封禪尚書呂震請如訥言
上曰今天下雖無事然水旱疾疫亦間有之朕每聞郡
縣上奏未嘗不惕然於心豈敢自謂太平之世且聖經
未嘗言封禪唐太宗亦不爲封禪魏徵每以堯舜之聖

堯太宗爾欲處朕於太宗之下亦異乎徵之愛君矣
當以古人自勉庶幾不忝宗伯之任

十六年十二月武當山宮觀成賜名曰太嶽太和山山有
七十二峰三十六巘二十四澗峰之最高者曰天柱境
之最勝者曰紫霄南巘上軼浮氣下臨絕壑舊嘗有宮
南巘之北有五龍宮俱爲祀神祝釐之所元季兵燬至
是悉新建之五龍宮之東十餘里名玄天玉虛宮紫霄
曰太玄紫霄宮南巘曰大聖南巘宮五龍曰典聖五龍
宮又卽天柱峰頂冶銅爲殿飾以黃金範真武像於中
選道士二百人供灑掃給田二百七十七頃并耕戶以

贍之仍選道士任自垣等九人為提點分主宮觀凡為殿觀門廡享堂厨庫千五百餘楹上親製碑文給之

洪熙元年正月命湖廣叅議諸葛平提督太和山宮觀

諭禮部令有司修繕郡邑應祀壇宇祭器違者罪之

宣德元年十二月有言明年二月上旬祭先師大社期適

當萬壽聖節恐妨行禮請改用中旬上諭禮部尚書

胡濙仍用上丁上戊日不可改

七年七月平江伯陳瑄言高郵郡城西北湖中有神祠古

碑載神姓耿名遇德宋哲宗時人天性忠實死而為

屢昭靈感封靈應侯廟額曰康澤禱之者舟行無恙

燬有應請令有司春秋祭祀上謂尚書胡濙曰神有

功德及民應在祀典果瑄所言其令有司以時致祭

正統元年雲南晉寧州塔墩有大樹頗著靈異土人號為

塔墩聖母永樂時大風折其樹軍人陳福海鋸以為板

內有神像戴冠執簡容貌如畫人皆驚異立祠以祀至

是州官請加封號上謂禮臣曰淫祀邀福非禮也

九年勅禮工二部諭兩京及天下有司應祀神祇壇廟久

荒廢者即設法備料修理工程大者酌量事宜以聞完

日擇人奉衛務在敬慎不許褻慢令風憲官按臨巡視

天順三年二月時祭風雷山川之神壇在城外上不欲

國朝典彙卷一百一十七
禮部
四〇八
八夜出問輔臣李賢可以勳臣代否賢曰果有故亦須代
但祖訓以爲不可上曰今後當夜出至彼無所止
宿欲效天地壇爲一齋宮如何賢曰可但宜減殺其制
上曰既有止宿日未下時至彼祭畢拂曙而回庶免夜
間出入賢曰聖慮極是

八年正月 憲宗初卽位禮臣引禮君喪三年不祭惟祭
天地社稷越紼而行事不敢以卑廢尊以已喪廢公祀
因以春二月祭大社大稷請 上如禮行之釋奠先師
遣官如故但免傳制制曰可

成化二十二年四月封金玉二闕真君爲上帝遣大學士
萬安赴靈濟宮祭之太常寺奏靈祭宮祭祀舊例用
羞近加封爲上帝宜用牲醴 上曰今後遇朕誕辰用
太牢致祭其餘如舊

按闕縣舊有靈濟宮永樂十五年 上寢疾藥罔効禱
之卽瘳於是建宮京師封金闕玉闕真人明年改封真
君後倪岳爲禮部尚書值遣祭靈濟宮奏曰徐知證知
詳唐叛臣之裔也祭典不敢議廢但歲時典祀一寺臣
之職耳宗伯何與焉遂爲令

弘治元年八月禮部侍郎倪岳言古制天子祭天地祭宗
廟祭社稷祭天下山川祭五祀并除正大之神漢壽亭

侯關羽宋丞相文天祥俱祀典應祭外有所謂釋迦牟尼文佛三清三境上天尊者北極中天星主紫微大帝者九天應元雷聲普化天尊者梓潼帝君者祖師三天扶教輔玄大法師真君者大小青龍之神者東嶽泰山之神者北極佑聖真君者崇恩真君隆恩真君者金闕上帝玉闕上帝者神文聖帝神母元后金闕元君玉闕元君者皆僭誕不經俱宜罷免不報

六年七月兵部尚書馬文升奏載考帝舜紹堯之後肇十有二州封十有二山蓋每州必表封山之高大者以爲一州之鎮如五鎮五嶽之神東嶽泰山在泰安州東鎮

沂山在臨朐縣南嶽衡山在衡山縣南鎮會稽山在會稽縣西嶽華山在華陰縣西鎮五山在隴州北嶽恒山在渾源州北鎮醫巫閭山在廣寧衛中嶽嵩山在登封縣中鎮霍山在蒲州三代而下歷秦漢隋唐俱有原封之山致祭至五代失有河北之地宋有天下未能混一北爲契丹所有後以白溝河爲界所以祭北嶽恒山曲陽縣俗傳有飛來石之說不知祭醫巫閭山於何處蓋宋建都於汴而曲陽在汴之北是亦不得已而權宜之道也迨我高皇帝奄有萬國建都金陵而曲陽遠在京師之北所以因循未曾釐正文皇帝遷北平而曲

陽却在京都之南當時禮官亦未建明獨祭北嶽於曲陽惟北鎮仍祭於北寧若以爲北嶽原在曲陽則周禮載恒山爲并州之鎮在正北我朝一統志亦載恒山在渾源州南二十里卽北嶽今本州北嶽廟址猶存洪武初定嶽鎮海瀆之神削去歷代褒加之帝號真可爲萬世之法獨北嶽猶祭於帝都之南非其故封之山誠爲缺典疏下禮部尚書倪岳議曰北嶽恒山祀於曲陽歷漢至今二千餘年不可輒改昔金世宗時議者以都燕請別議五嶽太常卿范拱言軒轅居上谷在恒山之西虞舜居蒲坂在華山之北未嘗據都改嶽 上從部議

八月禮部尚書倪岳等會議在京應祀大小之神及祀典應祭外其餘各寺宮觀神祇俱應裁革

九年三月詔修通州馬神祠祠在治之北地名壩上安鄉也初 文皇帝靖難兵起戰其地覺有神相之因詔作馬神祠久之祠廢至是詔順天府尹彭禮等修之

按是祠每歲春秋二仲遣太僕少卿一員往祀其辭曰皇帝命某官致祭云往必陞辭竣必延復其巖如此

十四年九月內旨差中官王端往武當山設像掛幡修舉齋醮命內閣撰勅并祝文大學士劉健等言茲山宮觀像設已極壯麗若復差官實爲無益矧今灾異迭出生

民困苦苗賊肆亂軍旅方興糧餉供餽猶恐不給君門
萬里豈能悉知宜斥邪妄以過無良報罷

嘉靖八年八月 上諭禮部惟我太祖定嚴祭祀之條
祖訓內山川諸神之祭皆無遣代者後以出入不便命
官行禮今災變多端宜禱於神以祈轉化今秋祭山川
諸神朕欲親往其爲朕具儀部覆舊山川等祭例於中
夜行禮聖駕先一日出郊宿於齋壇祭畢復俟侵晨回
鑾越兩日方可畢事臣等以爲祭有大小禮有隆殺若
祀山川禮儀與祭天無異非所以明品秩而尊神靈若
比祀先農例先時齋戒至五鼓駕出詣郊壇昧爽行禮

百官陪從其侍衛儀從悉依今春祈禱之儀 上曰祭
祀重事不可苟簡祀神之儀須有隆殺人君事天若事
親禮神猶敬長應行禮儀仍詳議以聞議上有先期遣
告太廟及是日迎神送神諸禮 上曰廟告官不必遣
其迎神用兩拜禮送亦如之部覆奏洪武十年 太祖
祭山川諸神 上親行中七壇禮餘壇以功臣分祀及
諤祀文內載月將城隍等神俱爲一通則兩廡六壇俱
在祀內似可免分獻又近年遣官行禮亦無分獻者乞
聖裁報曰祝文如舊兩廡遵我 太祖欽定典祀東廡
遣大學士翟鑾西廡吏部尚書方獻夫各行禮駕回作

樂如例 上復與輔臣楊一清等議所服欲用皮弁一清等考之會典集禮中俱不載服制未敢決既見內閣所藏存心錄內載祭太歲風雲雷雨嶽瀆儀注 皇帝具皮弁服行禮因請下所司著之令甲制可之

九年時有上書請祀高禩者禮部議於宮中震方擇地建壇歲仲春 上率后妃祀帝以高禩配 上以舉行不便罷之

御史熊榮請修天下祀典所載神廟 上曰應祀神廟令有司修理但近來奸民阿奉鎮巡司府州縣等官不問賢否槩立祠堂去思碑亭私創庵院淫祠今巡按御史

逐一查毀鬻價為修理神廟費不得更為科擾

十年八月 上親祀帝社帝稷於西苑禮成遂御無逸殿宴陪祀諸臣既而周覽幽風亭還宮

十一年改山川壇為天神壇地祇壇及別祭太歲月將旗纛城隍等神先是太歲等神皆合祭於山川壇 上釐

正祀典即園丘之西建天神地祇二壇以歲仲秋祀天神壇南向祭大明等神凡四壇壇一太牢地祇壇北向祭太歲等神十一壇一太牢又地祇從祀以京師山

川西向祭太歲等神三壇一太牢其酒三獻天神燎地祇瘞 皇帝以辰戌

地祇再拜皆飲酒受胙餘遣大臣攝祭其太歲月將旗
燾城隍皆別祭之太歲壇建太歲殿每歲十二月太裕
之日遣官祭之牛一羊一豕一禮三獻從祀以四季月
將之神東西廡凡四壇壇一太牢旗燾廟在山川壇旗
燾藏內府歲仲秋祭山川之日遣旗手衛官祭於廟霜
降日又祭於教場歲暮享太廟日又祭於承天門外皆
用少牢永樂後朔望有神旗之祭專祭火雷之神神機
營提督官請祭於教場日旗頭大將日五方旗神日主
宰戰船之神日金鼓角銳砲之神日弓弩飛鎗之神日
陣前陣後五猖等神皆南向牛一豕一羊一國有大征
討 皇帝武弁服襦服祭軍牙之神六燾之神皆南向
祭之 皇帝省牲視滌牛一羊一豕一樂三奏 皇帝
飲福受胙望燎刺五雞血於五酒碗酌神焉
十四年給事中陳侃使琉球還因許祭海神禮部議令福
建布政司官設祭一壇不爲例報可

上召禮部尚書夏言於無逸殿諭之曰西海子歲以午日
奉 兩宮遊宴止行望祀宜特建祠宇言退䟽言海子
者卽古燕京積水潭也出源西山神山一畝馬眼諸泉
繞出甕山後滙爲七里灤東入都城潞爲積水潭南出
玉河入於大通河轉漕亦賴其利比之五祀其功較大

禮宜特祀請於闡口瀉玉亭後隙地建祠詔可

十五年 上諭禮部朕以冲昧入承祖位敢不率由舊章

第以祭太社太稷奉我 太祖 太宗配竊有疑焉夫

天地至尊次則宗廟又次則社稷奉祖配天則正矣又

奉祖配社豈不失其序歟或謂以祖配社乃親親之道

此 皇祖時禮官之失也又謂后土勾龍氏乃共工之

子祭之無義夫勾龍氏有平水土之功故取之配社猶

以后稷配稷也未可論其人况父不善而可惡及其子

乎宜如 高皇帝制太社以勾龍氏配太稷以后稷氏

配其詳議具奏禮部乃集多官議大學士張璠翟鑾等

各言祖宗配位社稷歷代以來祀典不載我 太祖稽

古定制初無配位之禮後因禮官張籌之請遂沿襲至

今茲者天啓聖衷獨覺其舛况皆遵復祖制非有變更

茲會多官皆無異議 上從之至是 上祭太社太稷

祭畢出郊祭先農行耕籍禮

建金海神祠於大內西苑湧泉亭以祀宣靈弘濟之神水

府之神司舟之神二十二年改名弘濟神祠

十六年作聖濟殿於文華殿後奉安先醫之神歲時致祭

十八年 上幸承天命禮官經過道途凡有附近嶽瀆及

古帝王聖賢祠墓預奏遣祭於是次真定望祭恒岳衛

輝造祭濟瀆滎澤祭河鈞州望祭嵩嶽俱用大牢古帝王聖賢祠墓遣祭用少牢忠臣烈士祠用脯醢

二十六年十月命有司祠小孤山之神賜額小孤山廟勒

皇考詩於碑又 聖母先年舟過遣致茶果畱龍盤三

綵盤九卽用所畱盤定式龍盤一餐食二麥餅綵盤菓五蔬四加羊一豕一帛一爵三著爲令

三十二年八月祭太社太稷遣英國公張溶代溶行禮各

遽科道糾其不敬 上曰遣官如此陪祀官可知

事官可知是何禮法君逸臣勞之義何在溶勸臣之

報以世祿攝祀不敬他任可推姑罰祿一年今後發令

代者務加敬慎毋得慢神欺君二王今方成人俟三年

後命攝監禮官宜事事舉劾毋得怠視

立柳將軍神廟於新安鎮賜額致祭柳將軍山東人名匡

宋時從軍陣亡嘗見神於河道總理河道曾鈞奏祀之

四十四年八月祭雷雨風雲嶽鎮海瀆山川等神於神祇

壇是日方祭有短衣小帽數人馳出神門監禮御史顏

鯨叅寺官高後春魏承諾不能肅戒因言西郊夕月祭

用酉時此欽制也昨英國公張溶乃以申刻行禮戴日

而歸亦爲不敬宜通行罰治詔奪後春承諾俸一月溶

免究自後西郊以酉分祇事不許違錯

隆慶 年太常寺卿鄒應龍言靈濟宮之祭一歲中至三十餘次殊爲煩瀆宜照國朝功臣事例止以春秋致祭得旨仍舊行

國朝典彙卷一百十八

都察院右僉都御史 臣 徐學聚 編

禮部 十六

歷代帝王祀典

洪武元年命以太牢祭三皇

二年二月禮部奏按周禮太宰祀五帝則掌百官誓戒今擬大祀前七日陪祀官詣中書省受誓戒曰皇帝有事於某所各揚其職不共其事國有常刑制可

三年五月 上觀宋太祖詔修歷代帝王陵寢歎曰此美

事也遂遣編修蔡玄侍儀舍人李震亨陳敏于謙等往四方求之仍令各行省臣同詣所在審視若有廟祀并具圖以聞

上與學士危素論宋元興替素因言楊輦真伽發宋諸陵截理宗頂骨爲西僧飲噐事 上歎息久之曰宋南渡諸君無大失德與元又非世仇元旣乘其弱取之何乃復肆酷如是耶卽命北平守將吳勉訪求頂骨所在果得諸西僧廬中命有司厝於京城之南及紹興府以示穆陵圖來獻遂勅葬於故陵

四年三月禮部奏前代聖帝賢王自漢以來皆祭於陵寢

唐玄宗嘗立三皇廟於府州縣春秋通祀而以醫藥主之甚非禮也 上曰三皇繼天立極以開萬世教化之源而汨於醫師其可乎自今命天下郡縣毋得褻祀止命有司祭於陵寢禮部復議三皇五帝三王漢以下創業之英主守成之賢君歲時俱宜一體祭於陵寢 上曰古先聖帝賢王以及歷代帝王曾主中原安人民者皆春秋祭祀偏安之君雖賢不祭主中原而昏愚者亦不祀禮部復定議今祀帝王三十五河南陳州祀伏羲商高宗孟津祀漢光武洛陽祀漢明帝章帝鄭州祀周世宗鞏縣祀宋太祖太宗真宗仁宗山西榮河祀商湯

山東東平祀唐堯曲阜祀少昊北平內祀商中宗滑
縣祀顓頊高辛湖廣鄆縣祀神農寧遠祀虞舜浙江會
稽祀夏禹宋孝宗陝西中郡祀黃帝咸陽祀周文王武
王成王康王漢高帝文帝景帝興平祀漢武帝長安祀
漢宣帝三原祀唐高祖醴泉祀唐太宗蒲城祀唐憲宗
涇陽祀唐宣宗歲祭用仲春仲冬朔復命陵寢所在禁
民無得樵採置牌刻祭之月日牲帛之數於其上俾所
在有司守之以爲常式

六年禮官言古帝王有父子祖孫一廟一祭非禮令別立
歷代帝王廟同堂異室歲春秋祀

七月御史答祿與權言伏羲神農黃帝號稱三皇盛德大
業被於萬世我朝繼正統而有天下社稷宗廟之神皆
得享其祭而躬祀三皇之禮獨闕焉宜於春秋躬行祀
事庶成一代之典上納其言命禮官參考歷代帝王
開基創業之有功於生民者立廟祀之於是尚書牛諒
奏三皇開天立極有大功德於民京都有廟春秋享祀
宜令太常掌之伏羲以勾芒配神農以祝融配黃帝以
風后力牧配正位南面祀以太牢配位東面祀以少牢
漢高祖光武唐高祖太宗宋太祖元世祖宜令有司就
各陵立廟每歲仲春以少牢致祭商中宗高宗周成王

國朝典章卷一百一十八
帝王廟典
三
康王漢文帝武帝宣帝明帝章帝唐玄宗憲宗後唐明
宗周世宗宋太宗真宗仁宗亦宜命有司立陵廟三年
一祭祭以少牢上曰五帝三王及漢唐宋創業之君
俱宜於宗師立廟致祭其餘守成賢君命有司祭於陵
廟皆每歲春秋祭之

按歷代帝王廟成上親祀之各獻爵畢獨於漢高祖
增一爵曰我與公不階尺土以有天下比他人更難特
增此爵後遂爲制每帝王前皆一爵惟漢高祖三爵廟
中帝王塑像惟元世祖像出淚痕透其面上笑曰癡
達子爾失天下失爾漠北所本無我取天下取我中原
所本有復何遺憾淚遂收

七年塑帝王袞冕坐像上曰伏羲神農未有衣裳之制
勿加冕服

八月上躬祀歷代帝王於新廟自伏羲至元世祖凡十
七帝服袞冕行禮奏樂具有儀注

九年八月上躬祀歷代帝王

遣官行視帝王陵寢凡三十六陵遂禁樵牧設守陵戶陵
二人三歲一傳制遣道士奉香詣諸陵命有司致祭
皇帝卽位遣官祭告

十八年八月邠州請以姜嫄公劉二廟入祀典禮部議可

詔從之

二十年七月禮部請如前代故事立武學祀太公建昭烈

武成王廟 上命太公止宜從祀帝王廟詳武學

二十一年二月定歷代帝王廟制 上以文王雖基周命

終守臣節唐高祖有天下本太宗力可弗祀祀於陵增

祀隋文帝是年廟火改建於雞鳴山之陽去隋文帝十

六帝為五室中三室居三皇五帝三王如舊東則漢高

祖光武唐太宗西則宋太祖元世祖從祀名臣凡四壇

東廡第一壇九人第二壇十人西廡第一第二壇俱九

人歲仲春秋遣大臣致祭帝王每室太牢一禮三獻樂

七奏舞八佾兩廡每壇少牢一子午卯酉年傳制祭陵

歷代從祀帝王廟名臣禮臣具名奏請凡三十五人 上

以趙普負太祖厚恩不忠不可祀木華黎安童祖也不

可祀孫而去祖可祀木華黎罷安童祀祀伯顏阿朮可

勿祀又以陳平馮異潘美皆宜祀於是以前風后力牧皐

陶夔龍伯夷伯益伊尹傳說周公旦召公奭太公望石

虎方叔張良蕭何曹叅陳平周勃鄒禹馮異諸葛亮房

玄齡杜如晦李靖李晟郭子儀曹彬潘美韓世忠岳飛

張俊木華黎博爾忽博爾朮赤老溫伯顏凡三十七人

永樂七年八月遣官祭歷代帝王仍命以時修祀著為令



天順八年令各處帝王陵寢被人毀發者所在有司卽時
修理如舊仍令附近人民一丁看護免其差役

成化二年五月禁侵損古先帝王忠臣烈士名賢陵墓
弘治十三年八月廣東僉事徐紘奏乞祀宋楊太后於大
忠祠從之

嘉靖九年十二月 上以文華殿東室奉浮圖像不經撤
去之改設先聖先師伏羲神農黃帝堯舜禹湯文武周
公孔子神位伏羲等九龕南向周孔二龕東西向 上
自爲祭文行奉安神位禮并令輔臣張璉等及講官徐
縉等入拜禮畢 上御殿西室宣璉等論曰朕奉先聖

先師神位於此庶有所起敬起慕以爲進修之地朕不
聰賴先聖先師啟佑於冥冥之中然殿瓦棄修之力實
望於卿等璉等對曰 皇上景仰哲王以圖治化臣等
敢不敬承各賜茶而退 上乃告於奉先崇先二殿

國初郊祀祔祭諸帝王而省其春祭秋則遣官祭於廟是
年罷歷代帝王南郊從祀禮官請如南京廟春祭 上
不從令建廟於京師以歲仲春秋行祭而罷南京廟祭
十年春帝王廟未成祀於文華殿

三月歷代帝王廟成先是中允廖道南請改大慈恩寺興
辟雍以行養老之禮撤靈濟宮徐知證知諤二神改設

歷代帝王神位仍配以歷代名臣禮部覆言今國子監
廼祖宗以來臨幸之地恐不必更葺梵宇舊址重立辟
雍惟都內喜佛係胡元淫制敗壞民俗相濫毀棄靈濟
二神當時已得罪名教固宜撤去但所在窄隘恐不足
以改設帝王寢廟宜擇地別建得旨夷鬼淫像可便毀
之帝王廟工部其相地卜日興工於是工部消毀舊像
會官相擇帝王廟地因言阜城門內保安寺故址舊爲
官地改置神武後衛而中官陳林鬻其餘爲私地地勢
整潔且通西壇可贖還而鼎新之詔可遣工部繕修
如京提督工程工完 上親詣廟祭

九月修撰姚涑請黜元世祖以正祀典言世祖虐浮於犬
戎狡深於劉石貪劇於契丹暴過於女直給事中陳棻
亦以爲言且謂 太祖存其像祀乃開國諸文臣劉基
等中元進士與元以帝祀以掩其初仕元之失耳今北
虜方橫祀胡虜之君何以禁胡虜之侵疏下部議以爲
元受命九世世祖最賢其一代之治有足稱者且自古
帝王常優崇勝國以昭忠厚 太祖神謀睿斷必見於
此宜遵舊制廟祀如故 上從部議

十五年六月巡按陝西御史周鈇上言武功縣卽堯封后
稷有郃之地與稷母姜嫄各有廟祠里民歲時祭之第

未入祀典宜賜修舉下禮部覆議從之命翰林院擬廟額祭文西安府修飾遺廟武功縣春秋致祀

十八年 月御史謝少南上言慶都爲帝堯肇封之地堯母乃帝嚳元妃陵墓俱存乞賜表揚以弘達孝光巡幸下禮部覆議從之 上曰帝堯父母異陵可見合葬之非古卽令有司修建祠寢副朕追崇往聖之意謝少南建白可嘉改授左春坊左司直兼檢討

十一年詔修太醫院三皇廟仍釐正祀典正位以伏羲神農黃帝配位以勾芒祝融風后力牧其從祀備貸季天師岐伯伯高鬼臾區俞跗少俞少師桐君太乙雷公

馬師皇謚伊尹扁鵲淳于意張機華佗王叔和皇甫謐

葛洪巢元方孫思邈韋慈藏王冰錢乙朱肱李杲劉完素張元素朱彥修二十八人從祀兩廡牲用太牢器用一邊豆簋盞以仲秋仲冬上甲日遣大臣行禮著爲令

二十四年二月初禮科給事中陳棐奏乞撤帝王廟元主忽必烈神位及其臣木華黎等五人牌位 上曰元本胡夷又甚於五季帝王廟并墓祭俱罷棐復言帝王廟已撤胡元之祀而廟在兩京者亦宜撤去又請改兩京廟祀碑文并燬銷元君臣神主下禮部議覆俱報可於是削宋訥所撰廟碑命輔臣別爲文記之

隆慶四年遣禮部侍郎王希烈祭三皇於景惠殿因言三皇功在萬世國家既祀於歷代帝王以明正統之有自又祀於文華東室以遡道統之相承乃又雜之以醫師之流使共俎豆不亦瀆且褻乎又配之以勾芒祝融風后力牧安取義乎且公署中止宜有祠不宜有殿景惠殿之設於醫院已非其地况聖濟殿之所祀者不過先醫遣祀者不過醫官乃醫院則祀以三皇遣以部臣何內外互異而輕重失倫也臣愚謂宜存其祠宇裁其瀆祀春秋俱遣太醫院止祠先醫一如聖濟殿之禮尚書殷士儋覆從其言 上不欲改 先帝之制報罷 終

國朝典彙卷一百十九

都察院右僉都御史 臣徐學聚 編輯

禮部 十七

歷代名賢祀典

吳元年十月勅禮官建元右丞守安慶余闕江州總管李黼二祠肖像歲時祀之

洪武四年四月詔以元御史大夫福壽能秉節死義立祠祀之後復議贈其官禮部言元已贈福壽浙江行省左丞相上柱國追封衛國公謚忠肅宜仍其舊 上是之

令每歲春秋二仲遣官致祭

八年三月命有司立張巡許遠廟於歸德州歲時致祭

十二年正月御史連楹劾應天府尹曾朝佐祭歷代忠臣

不具祭服有乖典禮 上顧問廷臣吏部尚書阮峻言

祭前代之臣不具祭服相承已久下翰林院考證奏祭

前代忠臣便服行禮爲宜詔以爲常式

十三年二月遣應天府官祀歷代忠臣漢將蔣子文晉卞

壺南唐劉仁瞻宋曹彬元福壽凡五廟至二十年以其

溷處閭巷詔徙建雞鳴山之陽命應天府每歲以祭功

臣日致祭著爲祀典

十六年十一月禮部言秦蜀守李冰鑿山堰流以備水旱

民始殷富漢文翁爲蜀守仁愛化民興學教子弟宋張

詠爲蜀守民畏而愛之擬以文翁張詠與李冰同一祠

祀卓茂爲密令黃霸爲河南丞皆漢之循吏具載漢史

鈞州有霸廟址密縣亦有茂廟址葺而祀之正合祀典

陸遜及子抗從子凱世爲吳郡人當三國時文武兼資

爲吳將相以勞定國松江舊祠址尚存宜令有司葺祠

致祭四川隆川土神垂休侯李龍遷臣事於梁築城保

障川蜀邦人祀之雨暘疾疫祈禱必應唐狄仁傑諫立

廬陵王復唐社稷嘗謫爲彭澤令彭澤舊有祠宇理宜

褒祀謝夷甫肅宗時爲京畿令孟湜押兵過境縱掠百姓夷甫捕而斬之李輔國譖之於朝流建州卒塋於甌寧後見夢於帝立廟賜名靈通封武英侯元江州路總管李黼與其姪秉昭臨難死節廟食於九江義兵萬戶李宗珂從余闕守安慶城陷闕死宗珂自刎闕旣立祠安慶宜以宗珂配享皆從之命著之祀典

二十一年正月韶州知府王世安奏請修唐賢相張九齡宋名臣余靖祠從之

二十七年正月建漢壽亭侯關羽廟於雞鳴山之陽廟舊在玄津橋西至是改作與歷代帝王及功臣城隍諸廟並列通稱十廟云

四月陝西乾州同知史孟通言唐忠臣渾瑊在德宗時涇原兵變乘輿在奉天逆臣朱泚據長安引兵圍奉天晝夜攻城經月城中資糧俱盡瑊獨引兵苦戰百計禦敵卒能保乘輿全城郭功載唐史今其祠廟在而祀事有闕甚非報功勸忠之意宜令有司每春秋致祭詔從之永樂元年有司言殷太師比干墓及祠圯壞請修治從之三年三月巡按福建御史洪湛言福建自漢以來始通中國民不知學至唐常袞爲觀察使興學校人文日起宜立廟以祀從之

五月命修漢秣陵尉蔣子文廟

十四年十二月詔修曲阜兗國公廟

宣德二年二月遣順天府官祭宋丞相文天祥歲爲例

四年九月大理卿胡槃言臣奉命巡撫浙直訪知嘉興舊有陸贄祠湖州有胡瑗書院蘇州有范仲淹祠魏了翁書院今皆頽毀欲從宜修整未敢專擅 上從之

五年閏十二月歸德州知州李志言歸德唐忠臣張巡許遠死節之地故睢陽有協忠廟祀巡遠雷萬春南霽雲賈貴姚閻宋元以來俱命守臣祭之 上曰此不可闕命禮部定祀儀請以巡遠居正南霽雲等四人配享從之命翰林撰祭文有司每歲以春秋祭

八年八月吉安知府陳本深言廬陵縣城南舊有忠節祠祀鄉先賢歐陽修周必大楊邦乂胡銓楊萬里文天祥比來曠闕祀典人無激勸乞舉行之 上從所言令有司春秋祭祀仍以時修葺祠宇

正統六年十一月立御製堯國復聖公新廟碑

成化元年正月汀州府奏前推官王得仁當鄧茂七作亂時奮力殺賊卒於行陣請立祠宇以昭報祀部覆從之五月修比干廟命有司春秋致祭十二月命容城縣立祠祀元儒劉因

四年三月命祭宋丞相李綱於邵武府學

五年五月復元臣賽典赤廟祀於雲南元時賽典赤守雲南興水利以溉田崇學校以勸士民德之迨及廟食其地國初平雲南有司不廢其祀迨正統間廢至是復之九年九月永平知府王璽奏伯夷叔齊廟在永平境內洪武中有司致祭景泰中始廢今臣已重建請賜廟額祝文 上賜額曰清節命詞臣撰祭文令有司春秋致祭十年八月博野知縣裴泰奏宋儒程顥程頤二大儒其先博野人祖羽爲端明殿學士因家於洛陽本縣程委社實其祖居舊有祠堂近爲修葺乞勅禮部定其祭品儀

注令所司春秋致祭部覆從之

十一年正月賜故御史伍驥都指揮丁泉於上杭縣立祠祀之天順六年盜賊竊發泉率兵守備賊不敢犯次年賊勢益熾驥初入境聞變單騎冒險親造賊巢諭以禍福賊聞莫不感泣旬日間來歸者一百七十餘戶俱給以牛具穀種俾之復業惟賊首李宗政等負險不服遂委泉率兵深入攻營寨泉奮身力戰爲賊所害驥總督官軍吊死卹傷激揚義氣與賊十餘戰破掣壁等十八寨擒斬八百餘人賊平驥衝冒瘴癘致疾而卒衆皆悲痛立祠祀之知縣蕭宏奏載祀典賜其祠額曰褒忠命

有司春秋祀之

驥安福人景泰甲戌進士

十三年八月命杭州府祭唐臣褚遂良從儒士周璟言也
十八年七月命雲南布政司歲祭故翰林學士王禕

十九年正月命蕭山縣祀魏驥於德惠祠祠舊祀宋縣令
楊時驥家居日躬率鄉民修築海隄田獲其利邑人謂
驥之功與時等相率赴京具奏請以驥配祀從之

四月陝西巡撫阮勤奏岐山縣有周公廟咸陽縣有周公
墓泗縣有諸葛亮祠鳳翔府有范仲淹祠藍田有呂太
中大臨大鈞祠俱歲久頽圯乞修治并賜祭 上曰朕
考祭法凡德施於民以勞定國者則祀之周公制禮作

樂通行萬世諸葛亮興復漢室范仲淹經略西夏皆有
功當時而呂氏兄弟得伊維之傳又於各教有補者祠
墓弗修祀禮廢墜豈崇德報功之謂哉其令有司修治
於周公廟歲春秋二祭墓以二丁守視亮仲淹及呂氏
兄弟俱歲一祀庶稱朕褒表先聖先賢之意

二十年命有司歲祭廣東巡撫都御史楊信民先是信民
為廣東叅議以註誤去既而黃蕭養作亂起巡撫其地
招徠安集多所全活及卒廣人思其德相率請於朝為
立祠然歲時未有祭也至是聽選官盧從愿等請從之
弘治三年十月安慶府知府徐傑等奏郡治東有祠祀元

封國公余闕而守臣韓建不與焉臣考余闕所著大節堂記及元史竊以爲建在當時力攻固守其大節如被執之際病不可爲且罵賊求死其不屈如此且建守於前闕繼於後實爲一體禮部覆奏謂宜於闕祠內增設建神主祔享歲時致祭從之

命孟縣建唐昌黎伯韓愈祠春秋致祭并修理墳墓從知縣巫儼奏也

五年十二月給事中王璽奏宋季合州守臣王堅張珪當北虜猖獗時先後保障有功堅後遷寧遠節度使益勵臣節珪遷制置使城陷竟不屈而死乞建祠秩祀部覆於本縣鄉賢祠祔祭從之

六年十一月河南巡撫徐恪奏宋范仲淹并其子純仁墓皆在河南府城東南萬安山下屬傍近寺僧領祀事乞命本府於墓所建祠春秋致祭以子純仁配享永載祀典以風士類 上以崇祀先賢事關風化命所司議行九年二月四川巡撫馮俊奏故學士承旨宋濂以孫慎坐法謫四川至夔州卒沉淪幽壤聞者追悼乞勅禮部集議復其舊官顯加贈諡仍命有司春秋祭於葬所部議濂一代儒宗今不敢別議贈諡請仍依原學士承旨職事令有司就於葬所祠堂內春秋祭祀從之

給事中楊廉疏言故禮部侍郎薛瑄正學大節乞行平陽縣建祠賜額有司每歲春秋祀之仍下章丘縣取所刻讀書錄板本於國子監俾諸生皆得摹印翫味部覆上上曰薛瑄以性理之學繼宋諸儒後實我朝名儒卿等奏欲建祠秩祀并刊行文集悉准行其祠額特名正學十年九月巡按四川御史榮華以蜀漢北地王諶爲國死節無愧昭烈之胤乞仍舊封號春秋陪享昭烈廟從之十二年正月錢塘縣民岳華奏其十三世祖宋武穆王飛墓田在西湖者爲僧永年等所侵占上曰飛在宋忠烈可嘉墓田准令有司究治理之

十五年廣東布政周孟言宋丞相文天祥應詔勤王一時慕忠效義之士趙時賞等四十餘人亦皆奔走助順今天祥已秩祀典而時賞等未獲表章乞下廬陵縣爲天祥建忠義廟配諸賢於左右有司歲時致祭從之國子生裴春奏宋丞相江萬里爲賈似道所忌出知福州致仕嘗勉文天祥以世道之責後元兵陷饒州萬里及其子鏞并左右數人俱投止水以死乞下有司秩於祀典詔令江西巡撫官立祠於饒州本府官春秋致祭十六年四月巡按江西御史王哲言廬陵縣舊有忠節祠祀宋名臣歐陽修等六人我朝祭酒李時勉侍講劉球

國朝典彙卷一百一十九
知府劉子輔又郡人御史鍾同當景泰時潛移國本率
先倡義乞復 皇儲遂下獄死 英廟追贈大理丞
憲廟復官其子賜諡恭愍惟祀典尚缺乞勅有司同祀
於忠節祠下禮部議覆詔命鍾同准祔祭各處鄉賢祠
有徇情濫收者咸其實以聞

四月命貴谿縣重建象山書院祀宋儒陸九淵兄弟

正德三年三月福建叅政熊達評事徐元稔各疏請爲朱
興化同知陳瓚與姪同知樞密院事充閩廣宣撫大使
陳文龍立祠興化府以表其忠禮部議覆 上曰文龍
叔姪在宋季忠節忠義可嘉其立祠令有司春秋致祭

八年七月賜唐顏杲卿真卿祠額曰二忠令有司歲春秋
致祭杲卿官常山真卿官平原卽今真定德州地也前
知府彭澤於學宮右建二顏祠至是成知府李璞以祠
額請故有是命

九年嘉祥縣修曾子廟成巡按御史李璣請以門人子思
配享而以陽膚子襄公明儀沈猶行公明高樂正子春
公明宣單居離列子子思後從祀且請御製碑文從之
南和知縣李希夔疏言縣故有唐相宋璟祠宜載祀典詔
以璟守法持正爲唐名相其令有司歲仲春致祭

十年二月廣東巡按御史高公韶言韶州故有唐相張九




齡祠景泰中用給事中白瑩言以唐韶州刺史鄧文進
宋邕州推官譚必國朝永豐令鄧願俱附祠配享竊考
九齡子拯為伊闕令時安祿山陷河維拯不受偽官忠
義著聞而獨見遺似為缺典禮部議覆詔令從祀

十六年四月詔為都督僉事馬雲葉旺立祠遼東歲時致
祭雲旺洪武初為龍虎上將軍奉命由登萊渡海至遼
安輯軍民遼人相率歸附遂開設遼東都司及遼左等
衛比卒遼人多尸祝之而未有祠至是義州衛舍餘許
澤等疏乞立祠致祭以崇報功之典從之

命立宋陸秀夫祠於鎮江歲時致祭從巡按葉忠請也
五月詔立宋岳飛祠於武昌歲時致祭以撫臣秦金請也
七月詔祀故太保尚書黃福於昌邑萊州知府常道奏福
在先朝有大功其名德為鄉里所重雖曾為建祠而
未得載於祀典請令守臣歲時致祭允之

立太公廟於青州城西令春秋致祀從山東撫按請也
嘉靖元年命遼東都司合祀吏部尚書王翺都督僉事馬
雲葉旺於旌功祠遼人以翺嘗總制其地有功德於人
宜與雲旺合祀守臣以請許之
二年河南巡撫何天衢言雒陽周公經營之地宜建廟賜
額命春秋致祭登封縣舊有觀星測景二臺公遺跡也



國朝典彙卷之十一
禮部
十一
土產表漏具存乞勅欽天監委官考正制度尺寸書之
史冊禮部覆請報可

命祀故工部主事費瑄於呂梁洪瑄於成化間奉命管洪
築石壩捍水以通漕舟作石堤以便挽者歲省修堤草
束役錢三十餘萬又時旱疫瑄設法賑濟所全活甚衆
立民恩之私爲立祠至是知州張淮以請故有是命

詔修宋臣韓琦范仲淹祠於延州建故吏部尚書王恕祠
於三原命翰林院各擬祠額有司歲時致祭從都御史
姚鏌給事中張原奏也

命江西有司祀晉處士陶潛於彭澤從都御史陳琳請也
給事中劉祺言故大學士劉瑄立朝守正不阿至其孝祀
父母廬墓感有瑞麥嘉禾之祥鄉人號其所居曰仁孝
里立祠祀之乞賜祠額命有司歲時致祭詔從之

四年九月江西撫按陳洪謨秦鉞陶儼各疏言崇仁吳與
弼嘗蒙先朝禮聘授諭德不拜歸老於家砥礪名節
有功教化特建祠本鄉賜祠額祭文命有司致祭從之
十一年十月御史施山言大名府名宦如狄仁傑寇準鄉
儻如劉安世二宦一賢功德顯著宜如祀典專祀從之
十六年詔建故臨清知州夏鼎祠春秋致祭鼎大學士言
之父州民稱其有德政請建祠祀之遂有是命

三十八年十二月詔贈蘇松兵備叅政任環爲光祿寺卿
立祠廕子環前爲蘇州府同知倭寇犯蘇之間門城門
閉民避寇者不得入繞城號泣環按劍開門納之全活
萬計蘇人德之屢擊倭寇有功累進叅政矢志滅倭衣
服皆自識其名誓必死賊後以母喪歸遂卒於家禮科
給事中徐師曾上其事請贈祀故有是命

隆慶二年詔賜故禮部尚書歐陽德祀於鄉從江西撫按
請也

國朝典彙卷一百二十

都察院右僉都御史臣徐學聚 編輯

後學吳邦達 重訂

禮部 十八

功臣廟祀

甲辰九月 太祖命中書省繪功臣像於卞壺及蔣子文
廟以時遣官致祭

洪武元年追封故元帥郭子興爲滁陽王立廟滁州命有
司致祭以其鄰家宥氏世爲奉祠守王墳

二年正月勅中書省臣曰元末政亂禍及生靈朕倡義臨

濠以全鄉曲繼率英賢渡大江遂西取武昌東定姑蘇
 北下太原南平閩廣越十有六載始克混一每念諸將
 相從捐軀戮力開擴疆宇有共事而不覩其成建功而
 未食其報追思功勞痛切朕懷其命有司立功臣廟於
 雞鳴山序其封爵為像以祀之人孰無死死而不朽乃
 為可貴若諸將者生建忠勇之節死有無窮之榮身雖
 歿而名永不磨矣於是廟成祀徐達等二十有一人
 以功臣廖永安俞通海張德勝桑世傑耿再成胡大海趙
 德勝配享 太廟後罷永安而徐常李鄧湯沐六王侯
 其卒進侑皆 上所親定也然功臣無再成世傑而

詳勅
臣考

太廟有之馮國用丁德興茅成華高吳良吳禎曹良臣
 康茂才吳復孫興祖祭於功臣廟而 太廟不與此
 上之權衡量度非後人所能測識也
 九月命南昌府康郎山及處州金華太平等府各功臣廟
 有司依期致祭

十月命圖魏國公徐達開平王常遇春等攻戰之蹟於雞
 鳴山功臣廟

三年增戰歿功臣於雞鳴山功臣廟
 五年正月增功臣廟戰歿病故等項功臣百二十四員於
 兩廡各設牌一書功臣都督指揮千百戶衛所鎮撫等

用羊五豕五每四孟春暮遣勲戚大臣祭之

六年七月詔禮部每春正月秋七月享太廟之日遣官祭功臣於雞鳴山廟

七年六月命書雞鳴山功臣廟祔祭功臣姓名於籍每歲遇祭則製神主命都督府官主祭堂上各衛指揮祭兩廡永爲定式

八年正月遣官祭功臣於雞鳴山廟增祀華雲龍李恩齊等八人

九年正月遣官祭功臣於雞鳴山廟以指揮僉事余隆等百三十一人祔

七月又以何文輝及凡有功者一百六人祔祭功臣之次

十二年七月以吳禎等百九十三人祔祭雞鳴山廟

十三年正月以濟寧侯顧時等二百二十人祔祭雞鳴山

二十五年六月塑西平侯沐英像祀於功臣廟

永樂初上卽位遣官祭功臣於雞鳴山廟先是禮部侍郎宋禮言功臣自有廟罷太廟配享但於本廟祭之

上曰先帝所配定不可罷又曰此皆佐命開國之臣既自有廟矣太廟饗畢亦別遣官卽其廟祭之著爲令

三年遣官致祭中山王於家廟按王家廟在南京大功坊是年上諭禮部云中山王勲德國朝第一當百世

不可忘自今正旦清明中元十月朔冬至皆遣祭家廟

遂為制嘉靖中釐正祀典亦歲遣太常仍用五祭用少牢云

四年八月饒州府言鄱陽康山忠臣廟圯壞請命修治

上命工部即遣官督修仍諭所司歲時嚴祀禮守廟者

悉復其家

洪熙元年命禮部以河間忠武王張玉東平武烈王朱能

金鄉忠壯侯王真少師榮國忠顯公姚廣孝配享 文

皇帝廟庭

嘉靖九年八月 上諭輔臣曰廖道南嘗言姚廣孝弗宜

配享 太廟夫廣孝在我 皇祖時建功立事配享已

久或不当遽更但廣孝係釋氏之徒使同諸公侯並

于 德祖 太祖之側實非敬 祖宗之道禮部尚書

李時同大學士張璠桂萼等議以廣孝雖有帷幄之謀

厥後加以厚秩賜以顯爵亦足償其勞矣若削髮披緇

霑榮俎豆則非所宜臣等議當撤去即移祀於大隆興

寺內每歲春秋遣太常寺致祭 上從之仍命告於

皇祖 太宗以行

十年五月以誠意伯劉基配享 太廟詳勲臣考

十六年春進武定侯郭英從享 太廟先是郭勛欲進其

祖英於 太廟乃倣三國志俗說為國朝英烈記言生

擒士誠射死友諒皆英之功傳說宮禁動人聽聞已乃
疏乞祀英廟廡事下廷議皆謂不可戶部侍郎唐胄疏
爭言廟祀諸臣位次上下且不可易况有無之額敢輒
增損乎勛言往年進劉基祔享以文臣故舉朝翕然順
從臣祖英武臣乃紛然阻忌 上是勛言進英祀先是
二廟侑享功臣位各以爵及進基伯位公侯上 上不
喜曰何上基而下英也令禮官考議乃合二廟功臣敘
爵於是列英永義侯上河間東平二王黔寧王下基永
義侯下英未進侑時禮官夏言言禮有功宗之祀漢祭
功臣於朝廷魏祀尚書令荀攸於太祖廟唐高祖廟

宗廟或六七八人或二三四人宋太祖至光宗亦然如
魏徵李沆司馬光皆文臣不必皆武功也守成諸君亦
各有與享者不必皆創業也我朝 二祖開國靖難固
有功臣 仁宗以後爰至武宗其間相與輔贊治平豈
無有如魏徵李沆輩者今侑享 二祖凡十七人內惟
基廣孝二人文臣耳乞下廷議考求六朝文武大臣有
功在當時澤在後世者請上裁定進侑廟庭 上不允
〔按〕諸王功臣侑享洪武二年壽春十五王進侑 四祖
廟壽春於 孝陵爲伯南昌七王兄寶應七王從子也
太廟廡中木主稱壽春八王爲高伯祖考寶應七王爲

曾祖考禮官誤矣是年祔饗戰沒功臣已乃設青布幃於廟庭祀之尋更定功臣十三人合胡大海等七人已卒祔廟徐達等六人俟卒進佑八年設黃布幄殿左右廊於廟中殿考祀四祖左祀楊王皇兄徐王右祀功臣九年定壽春王王妃二十一人佑享於東壁功臣十二人西壁罷廖永安祀焉

國朝典彙卷一百二十一

都察院右僉都御史臣徐學聚 編輯

後學章有成 重訂

禮部

文廟

丙申 太祖如江淮府先謁文廟幸學至南昌亦如之

壬寅正月 上如隆興謁文廟

洪武元年令仲春秋上下遣官祭先師於國學丞相初獻學士祭酒亞終獻

二月 上御奉天殿傳制以太牢祀先師孔子仍遣使詣

曲阜致祭

八月遣官釋奠於孔子以後著爲令

二年正月遣前祭酒孔克堅祀孔子於闕里

四年禮部更定釋奠孔子祭器禮物犢一羊一豕一籩豆
簠簋登劍悉用磁器又擇監生及文職大臣子弟在學
校者克樂舞生

五月司業宋濂上孔子廟堂議曰世之言禮者咸取法於
孔子不以古之禮祀孔子褻祀也褻祀不敬不敬則無
福奈何今之人與古異也古者主人西向几筵在西也
漢章帝幸魯祠孔子帝西向再拜開元禮先聖東向先

師南向三獻官西向猶古意也今襲開元二十七年之
制遷神南面非神道尚右之義矣古者木主棲神天子
諸侯廟皆有主大夫束帛士結茅爲菽無像設之事開
元禮設先聖神座於堂上兩楹間先聖東北皆祭席尚
掃地而祭也今因開元八年之制搏土而肖像焉失神
而明之之義矣古者灌鬯炳蕭求神於陰陽也今用熏
蕓代之非簡乎古者朝覲會同郊廟祭饗皆設庭燎司
烜共之火師監之示嚴敬也今以秉炬當之非瀆乎又
古之道有德者使教焉死則以爲樂祖祭於瞽宗謂之
先師若漢禮有高堂生樂有 氏詩有毛公書有伏生

也又凡始立學者必釋奠於先聖先師釋奠必有合謂
國無先聖先師則所釋奠者當與鄰國合若唐虞有夔
伯夷周有周公魯有孔子則不合也當是時學者各祭
其先師非其師弗學非其學弗祭學校既廢天下莫知
所師孔子集羣聖之大成顏曾思孟實傳其道尊之以
爲先聖先師而通祀於天下固宜若七十二子止於國
學設之庶幾弗悖禮意開元禮國學祀先聖孔子以顏
子等七十二賢配諸州惟配顏子今以荀况之言性惡
楊雄之事王莽王弼之宗莊老賈逵之忽細行杜預之
建短喪馬融之黨附勢家亦廁其中吾不知其何說也
古者立學專以明倫子雖齋聖不先父食久矣故禹不
先鯀湯不先契文王不先不窟宋祖帝乙鄭祖厲王猶
尚祖也今回參伋坐饗堂上而其父列食於廡間顛倒
彝倫莫此爲甚吾不知其何說也古者士見師以菜爲
贄故始入學者必釋菜以禮其先師其學官時祭皆釋
奠今專用春秋非矣釋奠有樂無聲釋菜無樂是二釋
之重輕以樂之有無也今襲用魏漢律所制大成樂乃
先儒所謂亂世之音可乎哉古者釋奠釋菜名義雖存
而儀注皆不可考開元禮彷彿儀禮饋食篇節文爲詳
所謂三獻獻後各飲福卽尸酢主人主婦及賓之義也

今憚其煩唯初獻得行之可乎哉他如廟制之非宜冕服之無章器用襍乎雅俗升降昧乎左右此類甚多雖更僕不可盡若乃建安熊氏欲以伏羲爲道統之宗神農黃帝堯舜禹湯文武次而列焉臯陶伊尹太公周公暨稷契夷益傳說箕子皆天子公卿之師式宜秩祀天子之學若孔子實兼祖述憲章之任其爲通祀則自天子下達苟知其言則道統益尊三皇不汨於醫師太公不辱於武夫矣昔周立四代之學學有先聖虞庠以舜夏學以禹殷學以湯東膠以文王復各取當時左右四聖成其德業者爲之先師以配享焉此固天子立學之法也

上不喜謫濂安遠知縣祭酒魏觀亦以考禮稱

緩謫龍安知縣

五年文廟成遣官以大牢祭孔子駕視學行釋奠禮尊孔子封號曰大成至聖文宣王及配祀從祀諸賢儒如故六年八月翰林承旨詹同學士樂韶鳳等上所制釋奠先師孔子樂章禮部尚書牛諒復以所定禮儀進皆從之是年遣御史大夫陳寧釋奠先師孔子時胡惟庸劉基馮冕等不陪祭而受胙 上曰基等學聖人之道而不陪祀使弗學者何以勸既不預祭不當享胙命停基冕俸各一月寧坐不舉亦停半月自是不預祭者不頒胙



七年詔司府州縣衛學通祀孔子
二月朔日食下禮部尚書給事中
等官議文廟祀禮請改
用仲丁制曰可
命有司修治闕里先師廟廊廡祭器樂器法服其田產荒
蕪者悉蠲其稅仍設孔顏孟三氏子孫教授其族人
十五年四月上諭禮部尚書劉仲質曰孔子明帝王之
道以教後世使君君臣臣父父子子綱常以正彝倫攸
敘其功參於天地今天下郡縣廟學並建而報祀之禮
止行京師未遍天下豈非闕典耶卿與儒臣共定釋奠
禮儀頒之天下令每歲春秋仲月通祀孔子

五月上復命劉仲質與儒臣定議將釋菜之前一日有
司灑掃設御座於大成門外至日且上至御幄禮官
入奏請具皮弁服次請行禮導引官導上出御幄就
位百官各就位導引官導上詣盥洗位楮圭盥帨出
圭詣酒尊所酌酒詣先師再拜百官皆再拜楮圭執事
官跪進爵上獻爵授執事官獻於神位前出圭又再
拜百官皆再拜四配十哲兩廡分獻如常儀從之上
行釋菜禮成退御講筵祭酒吳顥等以次講畢遂賜
宴竟日而還次日顥率學官上表謝賜人衣三套詳國子監
二十年正月上詔工部右侍郎秦達曰春秋之世人紀

廢壞孔子以至聖之資刪述六經使先王之道晦而復明萬世永賴功莫大焉夫食粟則思樹藝之先衣帛則思蠶繰之始皆重其所從出也孔子之功與天地並立故朕今天下通祀以致崇報之意而闕里又啓聖降神之地廟宇廢而不修將何以妥神靈詔來世爾工部其及時爲修理以副朕懷

令郡縣官朔望詣學謁先聖然後升堂師生敘揖學官侍坐諸生東西立比次講說經史考課既已學官率諸生送出學門退

二十五年僉都御史凌漢大理寺丞曹瑾應天府尹高守禮府丞馮克昭祭先師孔子既迎神而後入班爲御史魯德所劾上曰祭祀不謹固當罪然既與祭但後時耳姑識之

二十六年頒大成樂器於天下令有司如式制造祀孔子三十年十月重建國子監先師廟

建文元年三月上祀先師於太學盥獻拜跪禮如郊社永樂初上出師至汶上飭將士曰孔子百世帝王之師太平之道所自出孟子傳孔子之道以開諭後世其功德在生民蓋與天地日月相爲無窮今曲阜鄒縣孔孟之鄉將士毋入其境侵及其一草一木皆誅不宥



元年八月遣官釋奠先師

三年禁祀孔子於釋老宮令祭物非所產者以所產代
八年九月撫安山東給事中王鐸言長山等縣文廟聖賢
塑像衣服左衽乞改正從之

九年閏十二月台州府言此文廟及學并按察分司解宇
因海風傾塌見有没入官屋請撤爲之 皇太子諭工
部臣曰廟祀先師何惜於此而取没入屋材其文廟令
有司別採材作之餘聽撤舊材爲之

十二年正月命修典阜孔子廟工完 御製碑文刻石

洪熙元年七月山東德平縣儒學訓導年富言天下儒學
文廟以崇祀先聖先賢近年以來十哲及兩廡從祀先
賢或置木牌或爲塑像或封爵差訛或位次失序甚者
闕而不置皆有司因循所致乞依洪武中定例重加考
按刊布內外永爲定規 宣宗曰朝廷崇儒重道爲緊
要事而有司不得人如此命禮部卽考正頒示天下

宣德六年八月鎮守洮州衛都指揮使李達奏修孔子廟
材木皆備惟少油鐵膠丹乞於陝西官庫支給 上謂
工部尚書吳中曰武將興學使其下人皆知尊禮孔子
而務忠孝誠可喜之事其悉從之

正統三年三氏學教授裴侃言天下文廟惟論傳道以列

國朝典彙卷百二十一
文廟
七
正位次闕里家廟宜正父子以敘彝倫顏子曾子子思子也配享殿庭無繇子皙伯魚父也從祀廊廡匪惟名分不正抑恐神不自安况孔子父叔梁紇元已追封啓聖王創殿於大成殿西崇祀而顏孟父俱封公爵惟伯魚子哲仍爲侯爵乞追封爲公偕顏孟之父俱遷配啓聖王殿庶名位胥安人倫攸敘上命禮部行之
七年漢中府石泉縣教諭黃士文言本縣民止一里五十六戶每春秋祭文廟用猪羊五十四隻帛三十六段措辦實難下禮部覆議凡州縣不及三里者春秋二下第行釋菜禮過三里者仍舊制

九年正月新建太學成上視學謁先師

十二年五月御史李奎奏孔子之聖歷代皆有褒贈國朝獨未有增加乞勅翰林院參考古制定以萬世莫加之美謚上曰孔子萬世帝王所尊功德難名雖累百言何足爲重不必增益

舊例春秋祭文廟其兩廡合用豕二粟棗各二十二斤黍稷各三升三合鉶鹽五斤十兩均分從祀一百九分景泰時太常卿許彬言其太薄乃增豕四隻粟棗各五十斤黍稷各一斤鉶鹽五十斤

天順六年三月調鎮江知府林鶚知蘇州時蘇學廟像歲

久剝落或欲加以修飾鶚曰塑像非古我太祖於太
學易以木主百年夷俗乃革彼未壞者猶當毀之幸遇
其壞易以木主有何不可或以毀聖賢像爲疑鶚曰此
土泥耳豈聖賢耶孔子生於佛教未入中國之前烏識
所爲泥像哉於是併易從祀諸賢皆爲木主

八年時有請以天縱二字加號孔子給事中張寧言孔子
道大德尊所貴明其禮以行其道被之天下傳之後世
不在封號求勝於一名一字可得而輕重也議遂寢

成化二年二月重修闕里孔子廟成上製文立碑紀之
衍聖公孔弘緒奉表謝

十三年正月祭酒周洪謨請加孔子封號改大成至聖
神聖廣運帝疏云若謂孔子陪臣不當稱帝則先儒經
從彥嘗曰唐旣封先聖爲王襲其舊號可也加之帝號
而褒崇之亦可也所封乃當時天王之王旣正南面之
位宜服冕十二旒衣十二章十二邊豆舞八佾且古者
鳴球琴瑟堂上之樂笙鏞祝敔堂下之樂而干羽舞於
兩階今干羽居上而樂器居下宜正如禮下禮官議尚
書鄒幹言正統十二年御史李奎請加封孔子英宗
不允今考聖神廣運乃伯夷贊堯之詞不若大成至聖
本於孟子中庸無可擬議洪武中建南京太學廟用神

聖當時祭酒宋訥碑文曰像不土繪夷習乃革分廟塑像徒仍元舊不忍撤毀故有冕旒原非國典籩豆佾舞之數祖宗器式具在不敢輒議惟佾數居下宜令太常考正 上從之洪謨又請臣比言孔子封號冕服籩豆佾舞等事尚書鄒幹以謚號器數之加否不足爲孔子輕重請仍舊爲宜孔子服冕已用天子之禮佾舞止用諸侯之樂以禮論樂則樂不備以樂論禮則禮爲僭乞勅廷臣計議增籩豆爲十二佾數爲八則佾舞與冕服相稱 上曰尊崇孔子乃朝廷盛典宜從所言其籩豆佾舞俱如數增用仍通行天下悉尊此制

十五年三月大同巡撫李敏奏今天下學校俱有樂以祭孔子大同雖邊方而樂獨缺乞照例頒降 上令所司製造樂器

十六年二月以監生虎臣言始詔天下學校孔子廟廷所在凡過其門者皆下馬

十七年二月國子監丞祝瀾請天下府州縣學文廟皆如南京國子監制爲木主 上謂文廟制禮已定何復紊亂舊章禮部看詳以聞侍郎周弘謨劾瀾輕率妄議命調外在調廣南府經歷

二十三年二月初七日上丁當祭先師以初六日命 皇

太子親迎傳制遣官改用次丁

翰林檢討劉瑞乞更定先師封謚下部格之

弘治元年正月 上視太學謁先師從吏部尚書王恕請
釋奠用太牢加幣

十二年六月曲阜孔廟災遣翰林學士李傑祭告發帑金
十五萬守臣重修

給事中楊廉因闕里災請更立木主以革夷教下部格之
十七年閏四月曲阜重建孔廟落成遣大學士李東陽祭
告及還東陽以所經過天災民瘼上奏詔議行之

正德元年八月南祭酒章懋奏廟學損壞請修理不報

七年賊犯闕里勅所司分兵防禦衍聖公孔聞韶以

至京具疏謝 上命巡撫官祭告仍爲修葺以慰其靈

嘉靖元年二月孔氏子孫彥隆承槩承緒乞觀幸學禮許

之次日 上幸太學賜祭酒趙永司業吳惠有差

詳國子監

九年 詔定百官謁文廟禮凡春秋二丁不與陪祀者皆

以常服列陪祀官後同時行禮正旦次日諸司必俟堂

屬畢集始得謁拜有先後參差者聽糾儀御史劾治

十一月改正孔廟號爲至聖先師孔子及先賢先儒等稱

初 上因纂祀典議成諭大學士張璁凡雲雨風雷之

祀以及 先聖先師祀典俱當以敘纂入璁因奏言雲

兩等祀及社稷配位俱蒙 聖明更正但先聖先師祀
典當更正者叔梁紇乃孔子父顏路曾皙孔鯉乃顏曾
子思父三氏配享於廟庭而叔梁紇及諸父從祀兩廡
原聖賢之心豈安於是所當亟正請以大成殿後另立
一堂祀叔梁紇而以曾皙顏路孔鯉配之 上以爲然
璉又奏孔子祀典自唐宋以來溷亂至今未有能正之
者今宜稱至聖先師而不稱王祀宇宜稱廟而不稱殿
祀宜用木主其塑像宜毀撤邊豆用十樂用六佾公侯
伯之號宜削只稱先賢先儒申黨公伯寮秦冉顏可荀
况戴聖劉向賈逵馬融何休王肅杜預吳澄宜罷祀林
放蘧瑗盧植鄭玄服虔范甯宜各祀於其鄉后蒼王通
歐陽修胡瑗蔡元定宜增入 上命禮部會翰林諸臣
議編修徐階疏以爲孔子之王號有不必去者三不可
去者五 上覽階疏不懌出階爲延平府推官 上又
製正孔子祀典申說頒賜羣臣云朕惟孔子之道王者
之道也德王者之德也功王者之功也事王者之事也
特其位非王者之位焉昨輔臣張璉再疏正其稱號與
章服等事已命禮官集翰林諸臣議正外惟稱號與章
服二事所關者重亦關於朕者不得不爲朕言之孔子
當時周家衰時知其不能行王者之道乃切切於王道

望於魯衛二國二國之君竟不能行孔子之道孔子既
逝後世至唐玄宗乃薦謚曰文宣加以王號至元又益
謚大成夫孔子之於當時諸侯有僭者削而誅之故曰
孔子作春秋而亂臣賊子懼生既如是其死乃不體聖
人之心漫加其號是何心哉自我 聖祖當首定天下
之時命天下崇祀孔子於學不許祀於釋老宮又除去
塑像止令設主樂舞生用六佾籩豆以十可謂尊崇孔
子極其至矣無以加矣時存塑像蓋不忍毀之也又至
我 皇祖考用禮宮之議增樂舞用八佾籩豆用十二
牲用犢而上擬乎事天之禮略無忌焉夫孔子設或在

今肯安享之乎昔不觀魯僭王之禮寧肯自僭祀天之
禮乎果能體聖人之心決當正之也至於稱王賊害聖
人之甚夫王者以有是德宜居是位堯舜是也無是德
而居是位皆亂世之君如桀紂幽厲是也若至於後世
之爲君而居王者之位者其德於孔子或二三肖之十
百肖之未有能與之齊也由是觀之王者之名非所以
重稱孔子也至於章服之加因其位耳孔子昔日名不
正則言不順言不順則事不成何其不幸身遭之哉夫
既以王者之名而橫加於孔子故使顏回曾參孔伋以
子而並配於堂上顏路曾皙孔鯉以父而從列於下安


有子坐於堂上而父從食於下乎此所謂名不正焉者
今也不可滋來世之非道除待該部集議施行外茲朕
不得不辨亦不得不爲輔臣辨聰也爲名分也爲義理
也若朕所正者亦如是所以防閑於萬世之下也設或
有謂朕以位而凌先師實非原心者是爲說已復爲正
孔子祀典申記俱令禮部送史館總復爲正孔廟祀典
或問奏之 上嘉其論議詳正併下禮部速集議以聞
十二月十三道御史黎貫等言臣等伏思尊莫尊於天地
亦莫尊於父師陛下舉行敬天尊親之禮可謂極盛無
可加矣至於孔子則疑其王號爲僭而欲去之昔太王

王季未嘗王也周公成文武之德追王之天下未嘗以
爲僭我 聖祖登極之初卽追尊 德祖 懿祖 熙
祖 仁祖爲皇帝是亦周公推本之意而不以位論也
至於臣子有大勳勞如徐達等身歿之後進爵爲王亦
或追封及其考是皆生未有王號歿而追封之也 聖
祖初正祀典天下嶽瀆諸神皆去其號惟先師孔子如
故良有深意今必欲去王號以極尊崇之實減籩豆樂
舞以別郊祀之禮竊恐禮儀未便情義未安 上曰貫
等意謂朕何等君也追尊 皇考爲皇帝號孔子豈反
不可本意如此乃以 太祖追尊四代爲言奸巧惡逆



甚矣君父有兼師之道師決不可擬君父之名孔子本
 臣於周與太公望無異所傳之道本義農之傳但賴大
 明之耳否則不必言祖述堯舜朕此舉與輔臣建議非
 上下雷同實正紀綱之大貫等毀議君上法司其會官
 問擬以聞於是都御史汪鉉言貫等妄議祀典彼但知
 稱王為尊孔子不知稱王不足以為尊適足以為瀆耳
 今稱曰先聖先師則視王之號固加尊數等夫曰先聖
 先師一皇上幸太學拜之可也若曰王則豈有天子而
 可以拜王者哉宜究問倡議之人明正其罪仍勅南北
 科道官自今建言毋得惑眾欺罔 上然之已刑部尚

書許讚等會訊貫等各贖杖還職 上曰祀典改正實
 出朕尊師重道之意黎貫乃妄引追崇之典猶存詆毀
 大禮之情糾眾署名肆意奏擾禡職為民餘從部擬
 禮科都給事中王汝梅等言輔臣張璠所論孔子封號蓋
 多主吳沈丘濬夏寅之說夫歷代追崇加以王爵冠用
 冕旒廟用殿祭用籩豆佾舞若去王而稱聖與師一布
 衣耳仍其官一司寇耳樂舞殿服皆燕所宜尊崇之典
 不應如是 皇祖仍舊蓋有深意若去王號止云先聖
 先師臣愚以為聖與師乃泛言之如伯夷伊尹柳下惠
 皆稱聖高堂生稱禮師毛公稱詩師伏生稱書師恐非



所以尊孔子也至於國學塑像 太宗嘗令正其衣冠
不如古制者我朝 列祖瞻祀而拜之百有三十餘年
今普天率土像設巍巍一旦毀撤而易以木主寧不駭
人之聽聞哉 上斥其逆論令錄前說記示之責對狀
十年提學御史章袞疏言孔子祀典不宜去王號 上以
祀典已有定議袞不遵行導人以正反爲異說惑衆狂
妄下都察院叅劾令對品調外

十三年 上視太學釋奠先師 上以孔子改稱先師具
皮弁服謁拜用特牲奠帛行釋奠禮樂三奏文舞六佾
從祀及啟聖祠分奠用酒脯已視學進諸生橫經布講

仍諭令敦本尚實勿徒事詞章祭酒林文俊司業馬如
驥以下賜帛有差

祭啓聖祠舊皆國子監堂上官行禮嘉靖十五年秋祭祭
酒呂柟司業童承敘俱有期服乃以學士張璧代之

二十七年增設承天府儒學文廟樂舞學故隸安陸州春
秋祀典有禮器而無樂至是御史賈大亨言報可

四十一年十月江西提學副使韓弼與巡撫都御史胡松
爭辨文廟兩廡牌坐不合棄官歸松具疏自劾御史陳
志謂曲在弼請奪弼職而留用松吏部覆議從之

隆慶元年命公侯伯應襲子弟俱赴國子監習禮以禮部



言視學在邇欲其迎駕故也

六月命禮部遣官取衍聖公孔尚賢及翰林院五經博士顏肇先孟彥璞仍取孔氏老成族人五人顏孟族二人馳驛來京以 聖駕將幸太學也

八月朔 上幸太學釋奠先師命大學士徐階李春坊陳

以勤張居正衍聖公孔尚賢吏部尚書楊博兵部尚書

郭乾吏部侍郎趙貞吉分奠禮部侍郎潘晟奠啟聖祠

畢 上御彝倫堂命武官都督以上文官三品以上及

翰林學士坐賜茶授祭酒司業坐講 上宣諭曰聖人

之道如日中天講究服膺用資治理爾師生其勉之

